

13

Vensa keke manon, vatin vita netan ?

Mulamun, siho keilu min manon, luvi time tahos. Luro en ai nesa, lumul lukanian. Out vasi, keilu lumul lukakaen, ka lumul en ai nesa, luro lukanian.



44

Avong tai, siho viteni min manon vit : "Tuak, kilekatnau, ek vati motakurur. Nihita neta ka nimaris nesa." Manon vit : "Tahos tuak, umoni." Manon mul lekati ka siho mul mutakurur. Vatin vita netan, maris nesa, vita netan, maris nesa. Siho viteni min tunali vit : "Manon, keikosuk kum visi suval ke inau namul namumoni. lalu vasi lehehita, lehema, lehehita, lehema." Manon maeni vit : Tahos, lehoumoni.

Keilu vasi lumutakurur, vatalu vita netan. Navong keke luvit luvomaris nesa, siho kei maris, ka manon kei sakras. Manon viteni mukok vit : "Sih, inau nasakras mahinaris nesa." Tunali vitesuk mini vit : "Manon, kiatkat lasiai, kima nesa. Navong ke manon katkat lasiai vit vom a nesa, avouen lehkati. Sih viteni mini vit : "Ama, ama." Manon kei sakras, ka viteni min tunali vit : "Tahosis Sih, keik kimita netan ke kihinaris nesa. Inau nitakurur varei."

Kosa kolesi keke manon, navong keke mutini en lasiai, mutini evus ka vatin lele varei mita netan. Ka kolesi keke siho, navong keke mutini en lasiai, vatin mita netan ka viles ris vina nesa.

45

Meatin leh vakili ka en tan volia ma ut. Kei muas meatin keilek en teai onen, ka kur vakili onen.



42

Kosa, rolesi keke volia lises ro teim vesesali ven meatin keil. Volia keil avi tuer varei, veni keke mulamun, volia kataun meatin en vakili onen.



43

Vensa keke volia ro ven meatin teim ?

Mulamun, meatin tai mul en meteimal tai, ka vakili onen tovuol. Kei lesi keke meatin keil houlu, vakili one mul, ka kei onen tovuol. Avong tai, kei mea ral teai onen ka vakekavel ka masmas, ven koan en vat vakili. Va rei vatiare tai. Vatiaeck mot mita netan, ka kei rakotehei. Evus, ka ling rumimatou mulen, ka out vong, va teim.

Matil vo out mulan, varis en umen onen ten vakili. Ka navong les vakili onen, lesi keke umen sav mul en vakili onen. Lesi keke vakili onen vonhonoris, suval arolingtei rumimatou veah. Kei reingeingeni asa sakini mairis mukok. Meatin mul musel kutut, ka sak rohoni rei vasuval koan rei eni nenganeh.

Volia varei kei keke ling ris sumevakili en vongien. Navong ke meatin mumonieris ka varis teim, volia kei emai mumonieris suval nenganeh. Ling sumeite varis en vakili suval aroreitei veah vaengeite. Out mulan, meatin mairis, lesi keke umen onen tisaris ka viteni mukok : "Mukave vakili onak vus tai nenganeh ka vonhonoris kosa ? Inau nitosasani en vongien, nilesi asa hemai hesien vakili, ka nuasi."

Kei ro en vongien. Musei, les volia ro lah sumevakili varisien. Meatin mea, kulat teai onen, vit vouas volia. Ka volia viteni mukok vit : "Konouastei inau. Tahos hi ialu minuk lehouum visan vakili. Vakili hi oralu. Keik kitei eilohten ka heilak ka asem, ka inau numon viau." Meatin maeni vit : "Tahos, hi oralu, lovoumoni."

Lumumoni suval koan luselesini. Munak lurei evus, volia kuvin tan eni ka lulehei va teim ka luki-les tetal meteriril. Evus, lulah eilohten, asem ka heilak. Lumuti evus, ka volia visisi en tan. Evus, luson vakili vita en atas.

Luvalis visi, ka meatin keil ten meteimal aumai ka alesi keke vakili onen meatin keilu min volia muloh tahos vareis. Avit vahi one. Keil vasi amaeni avit iluvos meatinenek. Aviteni mini avit : "Keik kiheoun inga, kilah inga ar." Meatinenek longe luvosien onen koan keilenek, musil keil auva, ka kei veou en inga vina nesa. Koan keilek avoulat ai ran tavoinga, ka kei mules nesa. Meatin keilek auva akur vakili onen, asoni vita en atas, amul amuloh eni.

Meatin, kei mules en inga nesa, mul mis, vo volia longe ren. Volia mai viteni min meatin vit : "Inau nasakras mahat ai koanik minuk. Kitosemau, inau numon viau tai ka kikaen kimita." Volia mumon viau evus, meatin mita netan.

Luva lules meatin keil keke avenan vakili, amul tai en mesai. Meatin vise keil, keil arolongtei. Kei mul rangis vakili onen, ka volia vit : "Tuak, kiling-nau niha en voihaus. Kitikoe, kisoni hehita en atas." Meatin mumoni suval koan volia viteni mini, ka voihaus sesai va vo rokol meatin keil ke amul en vakili. Keil alesi avit matou avani. Akuri ka volia keke ro neim, kei musi. Musi mukok, vite vo vareis. Meatin keil amus vite avit : "Matou kekek tisa, evo tai." Sakini mukok, keil ason matou mul varei en asem ten vakili. Keil areingeingeni keke volia mul parkat heilak ral eilohten en tan. Kei varis en voihaus, sesai varis ut.

Vensa keke utiuhouh karali mita netan ?

Vativeta tai keilu min vatiuhouh tai, mulamun lumul ruai. Lumulu luvina nesa vo navong keke lumul lurekou, ka heite mul en keilu. Vatiuhouh musel min vativeta vit : "Tuak, inau namul nakur ehon keil mul enau." Vativetamun musel min vatiuhouh vit : "Inaumun nalah ehon keil."



Lumul lulah ehon keil va vo navong keke heiai keilenek men. Vativeta, navong ke heite men, rivilein ehon keil avita netan. Keil vasi amerang avita netan ka amulueris, akuris vulin mama one.

Ka vatiuhouh, navong ke hungeite mukou, ka vit vativilein ehon onen keil avamita netan, kei sakvis keil. Son keil vati katau, ka avita arovitatei netan. Avita, ka asaliris en hen mama one nesa. Vatiuhouh vis vativeta vit : "Keik korivilein ehon onom keil avita netan, ka keil vasi amerang avita netan ka amoulis. Ka inau, narivilein ehon onak keil avahita netan, ka avita auves en hek nesa, amutout hekus. Nisakini hemukave nison keil ihita netan ka imoul ikuris vuluk ?" Vativeta musel min vatiuhouh vit : "Vatiuhouh, kisovis ehon onom keil vati helamun." Vatiuhouh kei viteniesuk vit : "Tahos, nihiles keilesuk. Nihiles ehon onak keil, nison keil vati helamun." Kei mumoni mukonek, ka ehon onen keil vasi avita, vati mulamun, ka oute keilu karali katau.

Kosa rolesi keke eang muh lat utiuhouh ka oute mul karali katau.

Manon vit : "Tahos havivis, meatin muasnau." Asu vit : "Tahos, namudem sise tai keke numoni minuk keke ialu vasi lehelohlohsai ran meatin navong ke meatin vit vouas ialu. Keik kiha kikuri outaro helu hemai, numoni hi avouem." Manon kei longe ren asu, va kur outaro elu. Asu vit : "Tahos, nilingi hi avouem. Navong keke meatin hemai hehit houas ialu, inau niha en vae emak, keik kika kihina nesa." Asu ling avouen manon ka viteni mini vit : "Ka visi !" Manon muka vina ka vit : "Tuak, komumoni minau tahos vareis !"



Manon keilu min asu luvitaris en ah esen meatin. Lumul lukanian en ah, ka luraengoni keke meatin mul ema. Navong lulesi kistal en ah, asu loh va en vae emon, ka manon kei muka varei vina nesa.

Tunuen koanik viteni mukave keke koşa rolesi keke manon kei mul muka, ka asu kei romukatei.

ahu vit : "Ahu, ialu lomual mukok, ka keik avong vasi komul kovopora houlu. Mukok, meatin keil amules amusil ialu, anouas ialu. Lokanian out tanges, lomatil out tanges, lomual out tanges, ka tanges, lomatil out tanges, lomual out tanges, ka keik kosakin verien houlu. Tahos keke ialu lehetasil. Keik kihotin out tai keke kihafen, inau nihotin out tai keke nihaen."

Ahu kei redemi out tovuel ke vahaen. Lumul evis, ka ahu redemi keke kei heha heto en atas, ka meau kei hetonges en eivorohus. Ahu mea ran meau, va en atas. Kur outesuk en atas vi out onen. Meau kei mulenges en eivorohus vi out onen.

Kosa rolesi keke ahu mul en atas, ka navong vit vahas, hema hehas en veien enout ut. Ka meau, kei rovitatei en atas, veni keke ahu ro noutenek.

10

Vensa keke manon, avouen mul ?

Avong tai, manon keilu min asu luro en eiai, ka meatin tai vit voumon ah esen. Meatinenek mumon ah esen, luh anien houluvis houluvis houlu mulen - ouh, atin, taro - tounah vasi keilek.

Anien esen moul vo tahos, ka avong vasi, kei ro sasauen ah esen, ro les anien esen. Avong tai, kei mai lesi keke voila elu mul en ah esen. Kei mudemi vit ven vuas, ka rovitei ven vuas. Vi ven manon keilu min asu. Navong meatinenek varis teim, manon keilu min asu, luva en ah esen meatin, ka lumul lukan anien esen. Lises lumul lukan anien ke mul en ah esen.

Meatinenek mairis, lesi keke amul akan anien esen, ka viteni mukok vit : "Asa keké mul purun anien esak ? Numoni hemukave ke nihotini ?" Muredem mukok ka vit : "Tahos keke inau matokus visi, malesi keke iseï keilu lehemai en ah esak." Meatinenek va rokus en ah esen, ka lese keke manon keilu min asu lumai en ah esen, ka lukan tounah vasi keke kei luhi en ah. Meatin les keilu lumai en ah esen, kei vous mariai tai, loh mita.

Manon keilu min asu, lulesi keke meatin mul mita ven keilu, ka asu kei lohosai va en vae emon. Ka manon, out tovuel vahaen. Meatin vita mul muas manon, ka manon laposesuk vita mul netan. Manon vesesali vomat, ka meatin romuvinitei. Kei vitenies min manon vit : "Kamil netin milpurun ah esak. Navong ke nileris kamil, nuvini tai varéi !"

Meatinesuk varis teim, ka asu sital ris ran vae emon, vita lekat manon. Visi vit : "Tuak, tahosis ?"

Molau, out tovuelimun avatoen, ka keil vasi arasil venout Molau. Ama aling meteimal mul enout Vouleli. Meatin tas, kei kurkat teiai tai keke sesai va enout Liman. Outenek avise en Lokovu, ka meatinnek va mumon meteimal en outenek mul keke rokol kosa.


Kosa, Vouleli keil amul auva ales Lokovu keil, ka Lokovu keil, avong koan, amul aumai ales meatin keil tenout Vouleli, veni keke keil alahruai mulamun enout Molau. Ka kosa, rolesi keke Molau, out tovuelimun. Outenek vi amai keses, vi out ten mesaus keil.


9

Vensa keke ahu ronges en atas ?

Mulamun, ahu keilu min meau, lumul lulahruai en eivorohus. Lumual out tanges, lukanian out tanges, lumatil out tanges.

Ahu, navong ke kei mul mual en eivorohus, kei mul vopora houlu. Meau kei longe alien onen ahu romaltei en redemien onen. Meau viteni min





lehkat vakili onen vina en veien. Va les meteilau onen teim sen, ka meteilau onen viteni mini vit : "Avov, ahis kekek am, ka romedei yeah keke kovakuri kosa. Keik kihinaris Tahal Nesa, kito kihuli avong, ka munak ahis hemen, kimitaris kikuri."

Avov onen litetainek valis ris vina. Mul vo rovitalahtei enout Molau. Ahis men, ke meteilau onen rei mita, kahiti, ka keies kani. Ehon tai tenout Molau kur okahis, ka ro veheilouni en atas. Ehononek kur ton okahis, ka eang kuri vo sesai vina ut Numali, veien tai tenout Tahal Nesa.

Meatinenek lesi, kilea : "O, ahis kekek alesi suval koan ke meteilau onak viteni minau noais." Kei son vakili vita, vit vales meteilau onen, vahisi eni. Les meteilau onen ka visi vit : "Keik kokosein ahis ak ?" Meteilau onen viteni mini vit : "Keik koromitalahtei Avov, ka ahis emen. Narei ka nakani tuai." Avov onen viteni mini vit : "Inau nalesi tuai, tahosis kenek."

Ka avov onen litetainek vuroh varei. Navong ke avov onen vit varis vamai, kei kur hatiatan tai tenout Molau. Kuri ral okahisinek, ka vilesiesuk mumoni en sakien telamun. Soni vita en atas. Sakin atas mai houlu ka eang keih. Atas mai houlu, sakini atas vilkoe out Molau. Meatin keil tenout



8

Mukave keke out Molau mul en atas enout Vouleli ?

Mulamun, out tai avise en Molau, mul vesesal venout Tahal Nesa. Outenek vi out tai keke meatin keil amulen. Mulamun vi meteimal, ka kosa rolesi keke out Molau vi amai. Tunuen koanik vitusil out Molau, mukave keke atas vilkoe.



Mulamun, meatin tai tenout Tahal Nesa ling isen mul en litetai tai tenout Molau. Avong tai, meatinenek valis en vakili vit vales meteilau onen enout Molau. Kei valis va, vinasuk ut Molau, ka



7 Rokur ahang mukave ?

Mulamun, enout Voum, ahang tovuol. Meatin keil amules akan anien koan keke metes, ka navong keke an mai, an mules kat keil.

Avong tai, meatin keil ten meteimal tai, auva amul amual en eiai, ka alonge ai elu lumul luvilehilei nesa. Ai keilu lumul luvilehilei en eang ka lumul lumis. Meatin keil amul asaisai lekati. Alekat i vo avotin out keke verien kaen. Alesi keke munak eang muhuh keih, ka ai keilu luvilehilei keih, munak eang muhuh keih, ka ai keilu luvilehilei keih,



ka ai mul rupas. Meatin tai veou vina nesa, ka munak sasa rokol out keke ai keilu lumul luvilehilei, ka outenek mutin. Meatinenek vise vita min meatin keil : "Ia, outekek mutin !" Meatin keil amulesuk amuredemi avit : "Eang muhuh ka ai mul rupas. Eang muhuh, va vati, ka munak meatinesuk kei vahilei ai, ka asa vamai vakistalien ? Rovosakvisi !"

Arei ai tai koan marite, alingi mul netan. Arei ai tamun koan havivi, avise en *tiai*. Akurkat koan havivi, avilei en koan marite. Avilei mukok, ka sokoite mul mai. Sokoite koanik avise en *tan*. Amul alahruain *tan*, ka mul rupan. Munak avileikati keih, ka ahang kistal en *tan*. Keil vasi varei alesi mukok, asi keil houlu. Ahang mukan mukok, ka alengas rotoh en anien. Arokadeimun anien koan keke metes, akan anien koan mas.

Enout Voum, tunuen koanik vit meseni keke ai kei keke sakin ahang mulamun.



Meatin keilu min ason luvit luvamun ani, ka lehemuni hemukave ? Lukur ani tai, ka aman tai avise en *hotil* muka mai. Hotil mutini en asiai tai, ke keilu lulesi. Meatin va vul koteh ai, ka hotil mairis viteni keke hehoseini hehita en atan. Kei mumoni mukonek, ka hotil mairis ling vatin en ani, ka mai lingi in eihenek. Meatin kileasuk keke heosem ani en ai, ka mumoni suval koan hotil viteni mini. Kosem ani, ka kurkat heite mul en hen. Koan keilu lehesakini hemukavesuk keke lehemun site ? Hotil mukaris mai, rili ani enout keke vi meten ani kosa.



Hotil rili, koan keilu lumuniesuk. Lumuni vo evus, koan keilu lehean aneite hemukave ? Hotil va rokol ani en vatin, ka vasuk rokol ahat. Meatin va kur ahat, ka mutivas ani eni. Lukan aneitesuk. Evis, luro varei lukekat vatimatounek ka luluhi mul en ah sealu.

En tunuen koanik, rolesi keke mulamun, matou tovuel enout Voum, ka matou koan mulamun vitoh en rahitan.



Luvina luro teim ka meahos vis ason vit : "Keik, mama onom ro kave ? Leheha en ah, lehekur ouh hemai, lehahiti ka leheha lehesani min mama onom." Ason maeni, ka viteni min ason koan meahos vit : "Mama onak ronges kevita en vaengeihat tai. Ka mama onak alesi rotahostei. Navong leheha lehesan anien mini, keik kilesi, kirometautei ?" Meahos viteni vit : "O, nirometaudei mama onom, veni nakuruk tuai."

Luva en ah, lukur ouh mai. Lukahiti, lumuas ato lulingi vaen. Aiok mas, lukuri luva. Luvita lumul en voiteh ten vaengeihat, ka atouli vise mama onen. Munak mama onen longe, kei reitei mai. Kei mul reitei, ka atan mul kulul. Meatin longe ke out mul kuluk mukok, ke ulin metau vareis. Munak meatin les mama onen ason, kei memeasieris, ka musohotieris. Atouli san anien min mama onen, ka viteni mini vit : "Meatin onak metau enuk, komal meleharis teim. Keik kikur anien am, ka keik kitosek."


Meatin keilu min ason lumuris luva teim, ka meatin mul muredem houlu, veni keke kei memou. Memou veni keke memeasi ka musohoti en meten avu onen. Redemien onen tisa vasi varei, ka mudemi keke houas mama onen ason. Kei sila ason vina en ah, ka kei vitaris en vaengeihat. Musingin ousil va neim en vaegeihat, ka muniti. Ahang kan mama onen atouli, kei mat varei.

Navong keke ason mitaris teim, kei les engeiven mama onen ka kilea keke kei mat tuai. Kilea keke ason kei muasi, ka vuroh kat ason. Kei viteni min ason vit : "Komunit mama onak, keik kikur suvon tai. Lehehita lehehisisi, lehetahini." Luva lurahin mama onen atouli, ka lumul lukekat out

keke lurahinien. Luro lukekat rahitan, vo outenek vitothesuk vi tounah tai. Luro lulekati va vo vi matou. Lumum motaini va vo matou rekou. Matou rekou vo mul vi ani.



Rolesi kosak, riou vasi keil aling suein ase va
en voimesalo, veni keke mulamun,asu kei puruni
en vatimelal.



6 *Vensa keke matou mul enout Voum ?*

Mulamun, enout Voum, meatin tovuol, ka
matou tovuol. Mul evis, ka meatin tanges, kei ro
en vatihou tai. Mariamot tai ro en vaengeihat tai
netan, ka amotinek vas atouli tai. Atoulinek moul
vo marite. Avong tai, meatin kei les atoulinek mul
mual en poal. Lesi, kuri vi ason, ka keilu luvina luro
teim sen meahos nesa.




5

Vensa keke riou ling asen va en voimesalo ?

Riou keil mulamun arolingtei ase vaha en voi-mesalo. Keil amules aleh ase katau en keil. Ka kosak, rolesi keke riou vasi keil aling suein ase va en voi-mesalo. Tunuen koanik hehit meseni mukave keke amul amumoni mukonek.

Mulamun, riou tai keilu min asu tai lumul lulah ruai tahos. Keilu vasi lumual, vo avong tai, asu kei votin vatihuai tai. Kei lesi keke out netan heihoai riviriv houlu vareis. Asu va viteni min riou vit : "Tuak, amai, lovahina lovatitei hoai aralu !" Riou kei maeni, ka luvina lusoruain hoai ealu. Riou kei



soruain an, ka asu kei soruain an, ka lumulesuk lumuti. Asu kei muti an, ka riou kei muti an. Keilu luva vo luvotin vatimelal tai, ka asu viteni min riou vit : "Tuak, amai, lehehina leheto nesa en vatimelal, leheto lehean aralu hoai." Riou maeni vit : "Kei tahos, lovaheouai."

Keilu luveoun vatimelal, ka lumul lukan hoai nesa. Riou kei mules kan meraun an, ka asu kei mul kan kekerat an. Lukani vo asu, an hoai evus mulamun. Kei vis riou vit : "Tuak, san tali amoli mani !" Ka riou san tai mini, asu kei kani. Kei kañi, kan kekeratieris. Asu ro havivis, ka vis ris riou, vit : "Tuak, ak hoai vus tai, san taris amoli mani !" Riou seseini vit; "Nasani kosasek ! Keik kokan vasi am, kovis risi. Inau nirosadeimun ! Inau ak tasesuk !"

Asu vuroh ka viteni min riou vit : "Kirosadeimun, inau nisuvul nihita netan ka niat vatiai kekek. Niat vatimelal ke niat rue varei. Hemaru, keik kimot kihita netan, kitivas asom !" Asu vis ris riou en hoai, ka riou seseinieris. Asu vit : "Tahos, keik kitosek. Inau nihita netan." Riou ros nesa, ka asu muso vita netan. Kei kat vatimelal, kati kati kati vo kat rue. Vatimelal maru, voukat rious luvita netan. Riou mutivas asen. Asu lohosai, ka riou mul muai. Asu kei longe riou mul muai, ke en mahisi. Asu varis ka viteni mini vit : "Tahos, keik koraengon mahien, ka inau nitilikoe asom hetahos ris."

Asu vina kur viau tai avise en *kilisu*. Mita rili asen riou en viaunek, ka lurosuk lumual vo asen mah. Riou kei metau eni keke asen vales vamu-konek. Kei vasuk votin heivoul tai. Kati vo kat vasi, kulat aneite, ka kani. Son asen va neim en heivoul, ka navong mul mual, mules lehei katau.

4

Mukave keke vetaoai kur isen ?

Navong tai, meatin keil en meteimal tai auva ka amul aseh oai. Oai keke amul asehei rosuvaltei koan keke kosa romul rosehei en wel. Oainek suval koanis vileral en eivorohus. Navong keke meatin keil auva amul aseh oai, meatin tai lele vita en oai, ka les niniven ouai tai. Kei les niniven out tai, ka viteniesuk min meatin keil vit : "la, niniven ouai tai keiek ! Niniven ouaisanek ?" Meatin keil amul asaisai raheit ai keilenek, vo ales vativeta tai. Ales



vativetanek, ka aviteni avit : "A, niniven vativeta varei kenek !" Ka alesi keke vativetanek mul rekou varei navonginek. Meatin tai veou vina nesa en vativeta, ka mul rah heite ka soni vita netan. Evis, meatineneck suvul mita netan. Meatin keil amunit ahangosuk, ka ason veta vita munahang. Veta mas, ka meatin keil akani. Akani ka avit : "Veta koanik akani tahos vareis. Rehehise varei en vetaoai, veni keke rolerohtoh en ninivenes en oai."

Tunuen koanik vit meseni mukave kosa romul rovise veta koanik en vetaoai.

areingeingen isen vetanek, ka avis me-Tavulai keil eni avit : "Veta avise en asa ?" Tavulai keil avit : "Veta koanik avise en *hoies*". Me-Liro keil asesedulai min keil, ka ason vakili ka auvaris Liro. Navong ke amul avalis auva, amul amusoun isen veta. Amul varei amusoun isen. Unu tei keil amul amusou mukok avit :

Vetasa ?

Ka unu tei amul amusourisi mukok avit :

Hoies !

Amul varei amusoun isen, ka souen teni vas mukok :

Vetasa ? Hoies !

Vetasa ? Hoies !



Avalis auva vo arokol out Vuali, vesesal venout Liro, ka e vobongin isen eris. Unu tei keil amusouni mukok avit :

Vetasa ?

Unu sav keil keke amusoun *hoies*, keil aromudem kileateimun isen, ka keil amusoun :

Hingan !

Ka amules amusouni mukok avit :

Vetasa ? Hingan !

Vetasa ? Hingan !

Unu keil aviles avit avaharis Tavulai avit avahis ris Tavulai keil en isen veta. Amuris auvaris Tavulai ka amul amusouni mukonek. Navong ke arokol out Tavulai eris, avis keil avit : "la, vetasangan ? Meva vis, emai vobinginieris." Ka Tavulai keil avitrisi min keil avit : "Vetanek avise en *hoies*." Unu keil avit : Tahos, mehedemkat vilai isen." Aviles ris vakili one, ka amuleris amusouni mukok avit :

Vetasa ?

Ka tesav keil avit :

Hoies !

Amul amusouni mukok va va vo arokol out Liro. Alehkatz vakili one vina ut, ka alahlat heivetal silite. Heite, alengasi en ahang vo mas ka akani. Silite, auva ka aluh vareini mul en ah ese.

Unu keil keke alah veta *hoies* mai Liro keke mul kosa. Ka kokilea mulamun, navong avalis en vakili, amusou keses ka sakin vakili muloh keih. Ka koanik vi souen ten vakilimun.

Unu tamun ke mul netan les men ka kei mudemi vit : "A, viau tai kek ! Inau nihina en vatiavek." Kei va vut retalin viau, ka rovitei viau, vi men unu keke ro nesa. Kei vut vina nesa ka laporis vita netan. Lapo varei en ai keke avoseini mul en atan. Eih sali, ke kei mat varei.

3

Veta hoies esen unu keil

Navong tai, unu keil tenout Liro auva Tavulai, en avong keke veta rekou houlu, ka avit avotahei veta. Akur vakili auva. Avita Tavulai ven tue keil. Aviteni min keil keke avit avotahei veta, ka auva amul arahe. Arahe houlu, ka alahlah heite ral silitemun va en vakili. Unu keil tenout Liro



Koan meahos vilei ahang vo mukan. Ahang mukan ka luson anien vitaen. Luro lukanian en vaen-geihat. Luro varei vo out vong. Out vong, tamealu keilu min latinealu lumai teim. Ason viteni min koan meahos vit : "Ehon keilu luromatei yeah. Outenga vongik ! Tounah tai nouas keilu. Lovaha lovalekat keilu." Ason koan meahos maeni vit : "Tahos, lovaha."



Luvask lumusil meteihat luva vo lules ahang rupan en vaengeihat. Luvina ka atouli viteni min keilu vit : "la, avu, komal melmai tai melro kele." Keilu lulonge, lukilea tuai koan keilu lumul tuai lumusav. Keilu luviteni luvit : "Tahos, kamil meletosek, komal meleharis teim." Ehon viteniesuk vit : "Vuasili esak keke toro tovengani hi samil vari melekuri. Ahineli nikur vareini komal." Keilu luvit : "Tahos, kamil meleto ekok, komal meleharis Voum." Koan kailu luro varei Ulveah luling meatin keil amul Ulveah. Ka Arei keilu min ason, luvaris luro Senarei luling meatin keil amul Voum.

2 Unu keke vut retalin viau

Mulamun, unu keil aro Liro. Navong tai, unu keil auva en eiai. Auva avit avaosem matou. Auva, asoruain matou. Unu tai kei va kur ai tai, ka musahi. Musahi evis, kei voseini vita en atan vi eih, avit avaosem matou eni.

Unu tamun, kei raengoni keke men kati tisa vareis, ke en vati vaha vameme enout tai. Kei les vatiavek tai, ka vit : "A, moreout tamemen kenek ! Inau nihina en vatiavek ka meatin hetovuel helesinau nimeme." Kei veou vina nesa en vatiavek, ka memes nesa. Kei meme ka simen vita netan.



Telro tellele vina Ulveah. Navonginek, out Ulveah ahang tovuol vatupanuen. Telro telmum en ah seatel enout Senarei, ka telrolestei varei ahang van enout Ulveah. Arei viteni min ason vit : "latel toro ekok, ka inau nales out Ulveah ahang rorupasteien. Vahera meatin tovuel en outenek." Arei va rei ahis ka muti vi vakili. Vakilinek kei sil isen tarivat. Kei kur vakili va valis vina vo lehkat vakili vina ut Ulveah. Vina lele, ka rolestei meatin. Rakat tata onen mul en veak tai mules, evis, muris mita enout Voum.

Lehkat vakili onen ma ut Voum, ka ason visi vit : "Kovina Ulveah kokosa ?" Arei viteni mini vit : "Navina en outenek, narolestei meatin, vaitir tehehina tehetoen."

Kei kur ason, natnali, natnahin, telvina Ulveah. Telvina ut ka tellesi keke tata mules yeah en vativeak, meatin tovuol varei vakulati. Telvina telkililin eim tai meatel. Telro en outenek. Telmumon ah vo anien mai tahos.

Avong tai, natnali viteni min tamen vit : "Tata, inau kovosahi ta hisuput onak." Tata onen musah hisuput onen, vitoa atuv teni, ka sani min titan.

Avong tamun, out mulan, tamen keilu min latin lumual luva en ah. Natnali keilu natnahin luros teim. Ehononek kulat hisuput onen ka keilu min ahinali luvita aiou. Ehon mul ruv ah keil keke avise en ahin Lovu. Ehon mul ruva, ka ahinali mul lahkati. Keilu lumul lumusil out luvina. Luvina vo soutin. Amai kat keilu ka luvit luvan ah keke ehon mul ruva. Ahin sel mini vit : "Lovaha en vaengeite, lovasiluh ahang ka lovadoi ah."

Luvina, ka ehon va vul koteh anguai tai, mai lingi mul netan, ka ahinali rokati. Ehon kei mul vilei, vit



voumon ahang. Ahinali rokat ai, ka kei mul vilei ahang. Vilei, vilei, vilei vo les tounah onen ahinali. Kei les tounah onen ahinali, ka ralkat ris ahinali. Va ven ahinali vo evus, ka atouli mudemi vit : "Lehehitaris teim, lehehiteni hemukave min mama keilu tata ?" Koan meahos viteni vit : "Lehehita, keik kihise avu en latinom varei. Koan ke vas ialu, kihise avu onom eni. Tomusav kek."

Meatin koan mulamun enout Voum

Meatin koan mulamum enout Voum, isen Arei. Ahi lingi mita mulamun enout Vol. Meatinenek mul mual vina, ka vati en ahat tai avise en Hilet. Kei musel, ka meatin tovuel valonge. Evis, vina Vutekai ka musel, ka meatin tovuel. Meatin mul mual vina vati enout vasi, mul musel, ka meatin tovuol varei enout Voum. Kei vina varei loholin out Tavie, vo rokol out tai avise en Senarei.

Meatin kur ason lumai luro en hou tai enout Senarei. Luro luro vo ason vange. Ason vasi ehon elu, atouli tai, meahos tai. Keitel vasi telro enout Senarei.



Fidel Yoringmal mumon piksa teni

Sero mumon kova teni

Mane keke kosani ven buk koanik vi ten buk netin. Koan keilu keke lumutis buk koanik, lurokuttei varei mane ven umen onealu. Kavman tenout Ostrelia kataun komai en buk koanik.

Mani we yu pem buk ia long hem, hem i blong mekem buk ia nomo. Tufala we i raetem buk ia, tufala i no karem wan pis mani nating long hem. Gavman blong Ostrelia i givihan long mifala blong mekem buk ia.

Tunuen keil keke kilesi en tus koanik

1. Meatin koan mulamun enout Voum	7
2. Unu keke vut retalin viau	11
3. Veta hoies esen unu keil	13
4. Mukave keke vetaoai kur isen ?	16
5. Vensa keke riou ling asen va en voimesalo ?	18
6. Vensa keke matou mul enout Voum ?	21
7. Rokur ahang mukave ?	26
8. Mukave keke out Molau mul en atas enout Vouleli ?	28
9. Vensa keke ahu ronges en atas ?	33
10. Vensa keke manon, avouen mul ?	35
11. Vensa keke utiuhouh karali mita netan ?	38
12. Vensa keke volia ro ven meatin keil ?	40
13. Vensa keke manon, vatin vita netan ?	44

TUNUEN TELAMUN

TENOUT VOUM

Joshua Mael keilu min Terry Crowley lumutisi

**USP Centre UPS
Port Vila
1984**